

# Kalaallit Nunaata Kujataani Qassiarsuup, Igalikup, Sissarluttup, Tasikuluullip aamma Qaqortukulooq- Upernaviarsuup eqqaanni nunaminertani killilinni kulturikkut oqaluttuarisaanermut ilaasumi allatigut kulturikkut eriagisassat pillugit Namminersorlutik Oqartussat nalunaarutaat

Eqqisisimatisisarneq aamma allatigut kulturikkut eriagisassanik kulturikkut kingornussatut illersuineq pillugu Inatsisartut Inatsisaanni nr. 11, 19. maj 2010-meersumi § 24, imm. 5 aamma § 32 naapertorlugu, aamma Nunatta Katersugaasiviata Allagaateqarfatalu tamanna pillugu inassuteqarneratigut aalajangersarneqarpoq:

## *Sumiiffimmik killiliineq*

**§ 1.** Sumiiffit ilanngussaq 1-im i nunap assingani nalunaarsukkami kulturikkut oqaluttuarisaanermi naleqarnera tunngavigalugu kulturikkut oqaluttuarisaanertut isigineqarpoq, taassumalu pigiinnarnissa illersorneqarnissaalu pingaaruteqarluni, taamaammallu sumiiffik allatigut kulturikkut eriagisassanik kingornussanut illersugassanut ilaavoq. Kulturikkut oqaluttuarisaanermi sumiiffimmik sumiiffinnut immikkoortunut tallimanut agguagaasoq nunap assingani koordinatinilu takuneqarsinnaavoq, tak. imm. 2-6.

*Imm. 2. Sumiiffiup immikkoortua 1 killiligaavoq Qassiarsuup nunaminertaanut. Sumiiffik ilanngussaq 2-mi takuneqarsinnaavoq.*

*Imm. 3. Sumiiffiup immikkoortua 2 killiligaavoq Igalikup nunaminertaanut. Sumiiffimmik ilanngussaq 3-mi takuneqarsinnaavoq.*

*Imm. 4. Sumiiffiup immikkoortua 3 killiligaavoq Sissarluttup nunaminertaanut. Sumiiffik ilanngussaq 4-mi takuneqarsinnaavoq.*

*Imm. 5. Sumiiffiup immikkoortua 4 killiligaavoq Tasikuluullip nunaminertaanut. Sumiiffik ilanngussaq 5-im i takuneqarsinnaavoq.*

*Imm. 6. Sumiiffiup immikkoortua 5 killiligaavoq Qaqortukulooq-Upernaviarsuup nunaminertaanut. Sumiiffik ilanngussaq 6-im i takuneqarsinnaavoq.*

**§ 2.** Kikkulluunniit nalunaarummi uani killiliinerit kingunerisai atorlugit kulturikkut oqaluttuarisaanikkut sumiiffit tikissinnaavaat, tak. §§ 3-9.

**§ 3.** Kulturikkut oqaluttuarisaanermi sumiiffiup ilaata tикинneqarsinnaaneranik annertunerusumik aalajangiinermi akiliummik akiliinissaq piumasaqaataasinnavaoq. Akiliuteqartitsisoqarsinnaassanngilaq inunnut, pisortanut, suliffeqarfinnut il.il. inuussutissarsiutitik naapertorlugit imaluunniit inatsisit allat naapertorlugit sumiiffinnik tikitsisinnaasussaasunut.

*Imm. 2.* Akiliut kiap pissaneraa akiliutillu annertussusia Kultureqarnermut Naalakkersuisoqarfiup aalajangissavaa.

*Imm. 3.* Akiliummi siunertaavoq sanaartukkanik sumiiffit akiliuteqarfiusut tикинneqarsinnaanerat siunertaralugu sananeqarsimasunik aserfallatsaaliuinermut, ingerlatsinermut pilersitsinermullu tunngasut matussuserneqarnissaat.

**§ 4.** Kulturikkut oqaluttuarisaanermi sumiiffimmi sumiiffit ilaannik sumiiffilluunniit ataatsimut isigalugu kusanaallisaataasinnaasunik aseruisinnaasunilluunniit ingerlatsisoqaaqquaanngilaq. Kalaallit Nunaata Katersugaasiviata Allagaateqarfiatalu immikkut ittumik pissutissaqartillugu tamatuminnga saneqqutsinissamut akuersisinnaavoq.

*Imm. 2.* Kulturikkut oqaluttuarisaanermi sumiiffimmut tikitsinerit atuinerillu itsarsuarmit kingornussat nunamiittut illullu eqqisisimatitaanerat pillugu aammalu kulturikkut oqaluttuarisaanermi sumiiffinni allatigut kulturikkut eriagisassanik kingornussanik allanik eqqisisimatitsineq illersuinerlu pillugit malittarisassat ataqqillugit pissapput.

*Imm. 3.* Kulturikkut oqaluttuarisaanermi sumiiffimmik tikitsinerit atuinerillu aqtsinermi pilersaarut sumiiffimmut suliarineqarnikoq ataqqillugu pissapput, tak. § 9.

#### *Mingutsitsineq*

**§ 5.** Iermik, sikumik, qaqqanik nunamillu mingutsitsinissaq imaluunniit eqqagassanik sunilluunniit qimatsinissaq inerteqqutaavoq.

*Imm. 2.* Piffissap ilaanni atorneqartarernnik tunngavilersuutissaqanngippat pequtinik, atortunik assigaannilluunniit nunami qimatsinissaq inerteqqutaavoq, tassunga ilanggullugit inuussutissarsiornermi atortut il.il.

#### *Naasoqassuseq nunalu*

**§ 6.** Inuussutissarsiornermut, savaateqarnermut allatullu nunalerinermut atatillugu suli ingerlatsisoqarsinnaavoq, kisiannili nalunaarummi siunertaq, tak. § 4, sumiiffimmillu atuineq pillugu malittarisassat tamanut tunngasut naapertorlugit ingerlanneqassallutik.

*Imm. 2.* Imm. 1-imi pisut pinnagit naasoqarnermik ajoqsiinissaq nunamilluunniit allannguinissat inerteqqutaapput, taamaattoq tak. imm. 3.

*Imm. 3.* Naasunik taamaallaat katersuisoqarsinnaavoq tamanna imatut pippat sumiiffimmi naasoqassuseq ajoquserneqanngippat.

## *Tuperneq ikumatitsinerlu*

**§ 7.** Tupernerit ikumatitsinerillu piffissani siviktsuni taamaallaat pisinnaapput aammalu sumiiffimmi naasoqassuseq mianeralugu pissallutik.

*Imm. 2.* Nunaminertat tamatigut tuperfigineqarsinnaasut Nunatta Katersugaasivia Allagaateqarfialu tusarniareerlugu Kommune Kujallermi Kommunalbestyrelsimit toqqarnejqarsinnaapput.

*Kisarneq, nunamut ikaarneq angallannermillu piffissat ilaanni killilersuinerit*

**§ 8.** Kommune Kujallermi communalbestyrelsi uku pillugit najoqquassanik aalajangersaasinnaavoq:

- 1) Kulturikkut oqaluttuarisaanermi sumiiffiup ilaanni kisarneq angallatinillu uninngatitsineq.
- 2) Kulturikkut oqaluttuarisaanermi sumiiffiup ilaati pillugit nunamut ikaarneq, taamaattoq tak. § 3.
- 3) Kulturikkut oqaluttuarisaanermi sumiiffiup ilaanni angallannermik piffissat ilaanni killilersuinerit.

*Imm. 2.* Najoqquassanik aalajangersaanerni isiginiarneqassaaq inuit, pisortat, suliffeqarfuit il.il. inuussutissarsiutitik naapertorlugit, imaluunniit inatsisinik allanik tunngavilimmik sumiiffimmut isersinnaasussat pisariaqanngitsunik isersinnaanermi minnut killilersuiffigineqannginnissaat.

## *Ingerlatsineq nakkutilliinerlu*

**§ 9.** Nunatta Katersugaasivia Allagaateqarfialu Kommune Kujallermi communalbestyrelsi isumasioqtigalugu soqutigisaqartullu suliamut attuumassuteqartut peqataatereerlugin kulturikkut oqaluttuarisaanermi sumiiffimmik aqutsinermut pilersaarusiussaaq. Aqutsinermut pilersaarusiqaq nutarterneqartassaaq.

*Imm. 2.* Aqutsinermut pilersaarut aqutsinermi atortuuvoq kulturikkut oqaluttuarisaanermi sumiiffimmi kulturikkut oqaluttuarisaanermi naleqartut qulakkeerniarlugit aqutsiveqarfinit atorneqartussaq tassungalu peqatigillugu kikkulluunniit sumiiffimmik tikitsisinnaassallutik taassuminngalu atuisinnaassallutik ineriaartortitsisinnaassallutillu.

*Imm. 3.* Aqutsinermut pilersaarut ukuninnga allaaserinninnermik minnerpaamik imaqassaaq:

- 1) sumiiffimmik ataatsimut isigalugu taassumalu ilaaniq aqutsinermi kina akisussaasuunersoq,
- 2) inatsit sorleq kulturikkut oqaluttuarisaanermi killilersuinersoq,
- 3) kulturikkut oqaluttuarisaanermi naleqartut suut kulturikkut oqaluttuarisaanermi sumiiffimmik illersuinersoq tunngaviunersut,
- 4) ajornartorsiutit annertunerit suut kulturikkut oqaluttuarisaanermi sumiiffimmut kinguneqarnersut kinguneqarsinnaanersulluunniit (kulturikkut oqaluttuarisaanermi naleqartunik navianartorsiortitsisinnaanersut),
- 5) sumiiffimmi inuussutissarsiornermik ineriaartortitsinissamik suut kissaataanersut,
- 6) kulturikkut oqaluttuarisaanermi naleqartunik navianartorsiortitsisut pinngitsoorniarlugit inuussutissarsiornermillu ineriaartortitsinissamik kissaatigineqartut ingerlannissaannut aqutsinermi iliutsit suut aallartinneqarsimanersut aallartinneqarniarnersulluunniit,
- 7) aqutsinermut pilersaarut piviusunngortinniarlugu aningaasatigut inunnillu isumalluutit suut immikkoortinnejqarnersut immikkoortinniarnejqarnersulluunniit aamma

8) ingerlaavartumik nutarterisarnissaq siunertaralugu aqtsinermut pilersaarummik piviusunngortitsinermik qanoq misissuisoqartassanersoq nalilersuisoqartassanersorlu.

**§ 10.** Kalaallit Nunaata Katersugaasiviata Allagaateqarfatalu Kommune Kujallermi kommunalbestyrelse suleqatigalugu nakkutigissavaat nalunaarummi matumani aalajangersakkat malinneqarnissaat, taamaattoq tak. imm. 2.

*Imm. 2.* Kommune Kujallermi kommunalbestyrelsip nakkutigissavaa § 8 naapertorlugu kommunalbestyrelsip najoqqtassatut aalajangersagaasa malinneqarnissaat.

#### *Pineqaatissiissutit*

**§ 11.** §§ 4-6-imut aamma § 7. imm. 1 uteqattaartumik annertuumillu unioqqutitsinerit akiliisitsinermik kinguneqarsinnaapput.

*Imm. 2.* § 8 malillugu najoqqtassianik aalajangersarneqartunik uteqattaartumik annertuumillu unioqqutitsinerit akiliisitsinermik kinguneqarsinnaapput.

*Imm. 3.* Ingerlatsivik, tamakkiisumik ilaannakortumilluunniit naalagaaffimmit, Kalaallit Nunaanni Namminersorlutik Oqartussanit, kommunimit imaluunniit kommunimi ataatsimooqatigiiffimmit kommunalbestyrelsit nunaqarfnnilu aqtsisut il.il. pillugit Inatsisartut inatsisaanni ilaasumit pigineqartoq, unioqqutitsisuuppat suliffeqarfiit ilaallu ilanngullugit pinerluttulerinermi akisussaatinneqarsinnaapput. Taamatuttaaq tamanna atuuppoq Kalaallit Nunaanni Namminersorlutik Oqartussat, kommuni imaluunniit kommunip ataatsimoorfia kommunalbestyrelsit nunaqarfnnilu aqtsisut il.il. pillugit Inatsisartut inatsisaanni ilaasoq unioqqutitsisuuppata.

#### *Atuutilersitsineq*

**§ 12.** Nalunaarut ulloq 1. august 2016 atuutilerpoq.

Namminersorlutik Oqartussat, ulloq 5. Juuli 2016

Nivi Olsen

/

Mikael Kristensen

Namminersorlutik Oqartussat

Imaneq 4

3900 Nuuk  
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit  
Namminersorlutik Oqartussat inatsisinut toqqorsiviat  
Naalakkersuisut